

Bir tekis chopib borayotgan ot keskin to'xtadi. Ko'zlarini yumgancha xayolga berilgan ko'yi kelayotgan Arslon oldinga xavotirlanib qaradi. Quyida Sirdaryo tinchgina oqardi, oqshom g'ira-shirasida suvi goh oqarib, goh qorayib ko'rinardi. Arslon otdan tushib nam-xush o'tlar ustiga cho'zildi. Maysalardan taralayotgan dимоqni qitiloqlovchi bo'y, daryodan esayotgan yoqimli shabada horg'in vujudini allaladi. Bir mahal ko'zini ochsa, daryoda oqib boryapti. U to'ppa-to'g'ri uyurma tomon oqardi. Hozir suv u tomon surib boradi-yu, uyurma ajdahodek og'zini ochib yutvoradi. Uyurmadan chetroqqa suzib ketish uchun qo'l-oyoqlarini harakatlantirishga urinar, uvvalo urinmasin, qimirlatolmasdi. Qarasa, qo'l-oyoqlari beshikka mahkam chandib tashlangan. Beshik qalqib-qalqib o'pqondek og'zini ochib turgan uyurmaga yaqinlashardi. To'satdan qirg'oqda oyoqyalang, boshyalang ayol ko'rindi. "Musulmonlar, yordam beringlar, bolaginam oqib ketyapti, nega qarab turibsizlar, insof bormi sizlarda!.." Ayol o'zini suvga otdi. Anchagacha daryoda ko'rinmay, beshik yonidan chiqdi. Endi qo'lini uzatgandi, beshikni uyurma yamladi

Arslon seskanib daryoga tikildi. U hamon goh oqarib, goh qorayib oqardi. Ko'zlari bejo bo'lib, daryodan beshikka qo'l uzatgancha qolgan ayolni onasini izlayotganini anglab qolib, o'rnidan turib ketdi. Nima bo'ldi o'zi? Uch kun avvalgi tushini tag'in ko'rdimi yo es-ladimi? Hali uyga borgach, onasiga ko'ngli g'ashligini, yomon tush ko'rganligini aytadi. Tushni yomon dema-e, bolam, deydi sog'inch to'la ko'zlarini undan olmay onasi, bosinqiragansan, boshingdan don-dun o'girib sochdingmi?.. Ilgariyam onasini ko'p sog'inardi, uzoq borsa, oyiga bir marta ko'rib kelmasa, hech kimga tuzukroq gapirmasdan, tund yuraverardi. Birontasi unga yurak betlab so'z qotmas, og'zidan chiqqanini darhol bajarishga tirishardi. Faqat qutiulug'lik o'spirin Turdiboygina "qishloqni sog'ingansiz, aka, borib kelmaymizmi," deyishga botinardi. Qishloqqa uning birov bilan borishini xushlamasligini o'spirin yaxshi bilardi, lekin har gal "borib kelasizmi", demasdan, "borib kelmaymizmi", deyaverardi. Hali negadir otning jilovidan ushlab oldi, "shu bugun bormang", dedi qayta-qayta yalinib.

U yoqdan-bu yoqqa to'xtamay yurayotgan Arslon daryoning nariyog'iga tikildi. Qorong'uda hech narsani ko'z ilg'amasdi. Bu atrofda o'zi biron makon yo'q. Faqat daryoning yuqorirog'idan, bundan bir chaqirim naridan kechilsa, to'g'ri Qutiulug'dan chiqiladi. Turdiboy ana shu o'n besh-yigirma uyli choqqina qishloqdan. Otasi o'lgach, Turdiboy daryodan o'tib, Arslonga qo'shilib qolgan. O'tgan oy besh kishi bo'lib Turdiboylarning uyini tortib olgan boyning uyini bosishdi. Shirin tush ko'rib yotgan ekanmi, boy tepasidagi qop-qora odamlarni ko'rib, o'takasi yorilayozdi. Ikkitasi boyni daraxtga bog'ladi, uchta qo'lga ilingan boyliklarni qopga tiqdi. Oq yaktak, oq ishtonchan boy u yoqdan-bu yoqqa g'izillayotgan sharpalar har o'tganda chunonam qaltirar, daraxt yoshroq yoki tagi bo'shroq bo'lganida ildiz-pildizi bilan qo'porib yuborgudek edi. "Yetimning haqiqa ko'z olaytirganning jazosi shu, hali bu xamir uchidan patir, agar yana boshqalarning uy-joyiga ola qaraydigan bo'lsang!.." Boy tomog'iga tegay deb turgan kelidastadek qo'llardan qo'rqib, dag'-dag' qaltirardi

Kechuvni to'g'ri tanlaganiga yana bir karra ishonch hosil qilish uchun Arslon tuyatoshni qidirdi. Uni topib, xotirjamlashdi. "Lochin!" Egasi pichirlagan bo'lsa-da, o'tlab yurgan ot yeldek yelib keldi. Hayal o'tmay, ikkov daryoda suzib borishardi Daryodan chiqishgach, ot oldinga yurishni istamay, depsinaverdi. Biron yirtqichning isini oldimi, deya xavotirlangan Arslon atrofga quloq tutdi. Jimjitlik. Faqat yuqoridan Lochinxona adirlaridan kaltakesaklarning, tunda yemish qidirib izg'ib yurgan hasharotlarning chirillagani eshitalardi. Tixirlik qilayotgan ot egasining achchiq qamchisi zarbi hadigida yurib ketdi. Tezda adir ustidagi o'zi ko'p yurgan yo'lni topib oldi. Adir kimsasiz, ot tuyoqlari oldidan g'izillaganacha kaltakesaklar o'tar, tinchlarini buzib borayotgan bahaybat maxluqni cho'chitishga urinishardi. Ot ularning urinishlarini sezish nari tursin, hatto o'zlariga ham parvo qilmasdi. Yuz qadamcha narida eski qo'rg'on xarobalari qorayib ko'rindi. Otning sarkashlik qilayotganidan xavotir Arslon qo'rg'onida picha nafas rostlamoqni o'yladi. Biroq yulduzlar charaqlayotgan osmon bu o'yidan qaytardi.

Qishloqqa qadam qo'yishlari zahoti nafas olish yengillashdi. Arslonning otdan tushib, yayov yurgisi kelar, lekin vaqt allamahal bo'lganidan tashvishlanib, ko'pchib yotgan tuprog'idan, dov-daraxtlardan ruhiga zavqli bir yengillik ato etayotgan bo'ydan uzoq-uzoq totishdan o'zini tiyardi. Lochinning ixtiyorini o'ziga qo'yib bergan, u katta ko'chalarni chetlab, dala yo'llaridan yo'rtardi. Ko'kka bo'y cho'zgan teraklar ko'ringach, otning qulog'iga pichirlab, qo'yvordi. Lochin egasi bilan picha yonma-yon borgach, uning joyida to'xtab qolganini ko'rib, dala tomon yo'rg'aladi.

Terakzorda Arslon o'zini tanasi bir qulochcha keladigan daraxt panasiga olib, atrofga quloq tutdi. Xavf yo'qligiga ishongach, bog' maydonlari tomon yurdi. Pastqam devordan oshdi, sharpa chiqarmay borib, onasi yotadigan uycha devoriga qapishdi. Oyog'iga bir narsa kelib suykaldi. Cho'chib o'zini nari olgandi, u yana suykaldi. Qarasa, it. Xo'rligi keldi. Itning g'ingshib, hovlidagilarni uyg'otib yuborishidan xavotirlanib, ochiq derazadan asta sakradi. Qorong'iga ko'zi ko'nikmay turgandi, qo'lidan birov yetakladi. Onasining hech narsa bilan tenglanmaydigan bo'yidan o'zini yo'qotay dedi. Uy to'riga o'tkazgach, ona o'g'lining yuz-ko'zlaridan o'pdi. Og'zi sho'rlanib, alam bilan yig'ladi.

-Uxlamay o'tiruvdingizmi, onajon?  
- Kelishingni biluvdim. Endi sira ketmasang, deyman, o'g'lim. Hech qayoqqa qimirlamasdan, oldiginamda o'tirsang.  
- Sizni ko'p sog'inyapman. Yoningizdan nari ketmayin deyman. Lekin ilojim yo'q-da  
- Seni sargardon qilganlarni saharlarda qarg'ayman. Xudoning ko'zi bo'lsa, hammasini ko'rayotgandir Bolam, ishqilib beva-bechoralarni xafa qilayotganing yo'kmi?  
- Onajon, nahotki siz ham menga ishonmasangiz?

- Dushman ko'ngil-da Onaginangni kechir, o'g'lim Elning og'zida xilma-xil gap.  
- Bilaman, onajon, sizlarni qaynab qo'ydim, yomon ahvolga soldim. O'g'ri degan so'zning o'zi xunuk  
Ona-bola gapga berilib, deraza yonida turgan sharpani sezishmadi. U eshikdan kirganda ona o'g'luga osilib yig'lardi. O'g'il tush ko'rgan kecha ona ham dahshatli tush ko'rgan, o'shandan beri tunlar ko'zidan uyqu qochgandi. Hozir ikkovi ham tushini o'ylar, bir-biriga aytishdan cho'chib, nuqul o'tgan-ketganlarni eslashardi. O'g'ilning go'dak bo'lib qolgisi, onasining issiq pinjiga tiqilib olib, rohat qilib uxlagisi kelardi.

Tuyqusdan dag'al qo'llar uni ona pinjidan yulib oldi. Munkayib ketgan Arslon o'zini o'nglarkan, ko'zlari qo'l egasini izlab, qorong'ini paypaslardi. Ortiga o'girilib, joyiga cho'kkalab qoldi. Ming qorong'i bo'lmasin, uch-to'rt yil berisiga otasini bunchalik yaqindan ko'rmagandi. Uning nafasi bolalik xotiralarini titkilab yubordi. Ota daladan horib-charchab kelganda, loyqo'rg'on qurayotgan o'g'lini ko'tarib olib, loy yopishgan betidan o'par, yuzini yuzlariga surkardi. Loyqo'rg'onni tezroq bitkazish o'yidan boshqa o'yi yo'q bola pastga tushaman, deb tipirchilar, nihoyat, charchog'i yozilgach, otasi uni ohista yerga qo'yardi  
- Sen bolada tariqcha oriyat bormi? Qaysi yuz bilan ostonamdan hatlading? Arslonning otasiga rahmi kelardi, uning ovoqidagi g'alati titroqdan ko'ngli g'ashlanardi. El-yurtda boshimni egganing yetmaydimi?  
- Otasi, rahmatli qaynatam, yurtning o'g'risi bo'lsa-da, o'g'ling bo'lsin, derdilar,- biron kor-hol bo'lishidan qo'rqib dag'-dag' titrayotgan ona erini yumshatish yo'lini izlardi.

- Miyasi suyulganda bir aytgan-qo'ygan-da. Otamning boshqa bir hikoyati bor edi. Eshit-gandirsan, o'g'rini osayotganlarida onasining tilini tishlab-tishlab uzvolganini

Erining nimaga shama qilayotganini tushungan ayol kuchini ko'z yoshiga berdi. Hamon cho'kkalagancha o'tirgan o'g'lini quchoqladi. Dag'al qo'llar uni o'g'lidan ajratib, bir burchakka itqitdi.

- Gap shu, senga! Men allaqachon senday o'g'ildan kechganman. Agar, yana shu xonadonga qadamingni qo'yadigan bo'lsang, yoqangdan olaman-da, mana shu ikki qo'lim bilan dor tagiga o'zim sudrab boraman. Yoki sazoyi qilib, falonchining o'g'li edi degan isnoddan qutulish uchun janazangni bitta o'zim o'qiy qolaman

Ona o'rmalab o'g'li tomon yaqinlasharkan "bolam, otangning gaplarini ko'nglingga olma, uning ichiga shayton kirvolgan, shayton" derdi birdayin. Arslon esa bir o'yda otasi-ning yuzini yuziga bosishini istardi. Ota birdan yumshab, emaklab kelayotgan kampiri tomon ko'targan oyog'ini joyiga qo'ydi. Bir og'iz so'zlamay cho'kkalagancha o'tirgan o'g'lini bosish istagi yuragiga hamla qildi. U tomon bir qadam qo'ydi-yu, xuddi oyog'i ostidan ilon chiqqanday ilkis orqaga tashladi.

- Baribir seni sazoyi qilishadi. Mayda o'g'ri bo'lganingda qo'lingni chopishardi. Seni sazoyi qilishadi, - ota cho'ziq "uh" tortdi, bo'g'zidan otilgan o'tli nafas Arslonning loyqo'rg'on loyi izi achishtirayotgan yuzini kuydirdi. Sazoyi qilishadi. Sen butun avlod-ajdodimizga isnod keltirding! Yo'qol!.. Sazoyi Daryo-paryoga cho'kib o'lganing, dasht-pashtda bo'riga yem bo'lganing yaxshi bundan. Yo'qol, deyapman!

Arslon onasini avaylab o'rnidan turg'azib, yelkasiga boshini qo'ydi. Ho'l yelkasi titra-yotgan onasidan bazo'r ko'ngil uzib, tislandi, derazadan sakradi. Orqasiga qaramasdan chopib borarkan, derazadan qo'llarini uzatgancha qolgan onasini ko'rmadi. Devor oshayot-ganda, ortiga qaytmoqchi bo'lgan Arslonni qattiq bir kuch ko'krigidan itardi.

Terakzorga yetar-etmas Lochin qorong'ulik qo'ynidan chiqib keldi. Egarga o'tirishi zahoti ot yeldek uchdi. Adirga yetishgach, Arslon jilovni tortdi, pastga tushib, eski qo'r-g'on tarafga yurdi. Ot u bilan yonma-yon yurar, na orqada qolardi, na o'tib ketardi.

"Lochinim, bu tun daryodan o'tmaymiz, eski qo'rg'onda qolamiz, suvning nariyog'iga qishloq havosi yetib borishi qiyin. Nega jim ketyapsan, kishnasang, sezib qolib, ortimizdan quvishlaridan xavfsirayapsanmi? Yo bo'lmasa, mening xafaligimni sezyapsanmi? Xafa bo'laman-da, lochinim! Ona qishlog'imga, ota yurtimga sig'may qolyapman-u Aytgin, men ularga nima yomonlik qildim?"

Axir, hammasiga yaxshilik qilmoqchiydim-ku!.. Yil-o'n ikki oy ishlab topgan bor-yo'qlarini boy qarzlaringga deya omboriga bosganida, xun-xun yig'lagan odamlarga achindim-da. Bu zamonda, yorug' dunyoda adolat bormi, deya nola qilishgan-da., chidayolmadim, bilasanmi buni! Boyning omboridagi don-dunni egalarinikiga oborib tashladim. Ertasiga qishloq ostin-ustin bo'p ketdi. Boy anoyi emas, yo'qolgan g'allani toptirdi. Sen o'g'rilarning umringni zindonda chirittiraman, deganida haligi beshovi baravariga boyga egilib, biz emas, o'limdan xabarimiz bor, ammo-lekin bu gaplardan xabarimiz yo'q, deyishipti. Boy nima degan, de: "Mana shu qoplardagi g'alla menikimi, senlarnikimi?" Beshovi to'tiqushday "sizniki, boy ota, sizniki", deyishgan. "Mening narsalarim senlarning hovlingdan topilgan, bu o'g'irlikmi, yo?.." "O'g'irlik, boy ota, o'g'irlik". "Demak, senlar o'g'risanlar!"

Hammani qo'lingni qirqtiraman. Ana keyin cho'loq qo'llaringga qarab erta-yu-kech tavba-tazarru qilasanlar! Boy beshoviniyam yerto'lasiga qamab qo'ydi o'shanda. Ertasiga ularni qo'yvorib, meni opketishdi. Qaysi biri men-dan gumoni borligini aytibdi. Uh, lochinim, lochinim, xayriyat, odam bo'lib tug'ilmagan-san-a O'sha adolat istaganlar bilan boy meni yuzlashtirdi. Beshovidan birma-bir "bu kim" deb so'rashdi. Hammasi "o'g'ri" dedi. Hammasi-ya Yerto'lada tuynukdan tashqari qarab turgandim, seni ko'rib qoldim. O'shanda hali toy eding. Esingdami? Tuynuk oldiga kelding-da, ketmay turaverding. Bir kechayu bir kunduz zax yerto'lada yotgan bo'lsam-da, o'shanda birinchi marta xo'rlikim keldi. Toychog'im meni sog'inib, qidirib kepti-da, dedim.

Ko'zlaringda sog'inch ko'rdim-da. Kechqurun otam kelib, rosa koyidi. Uzundan uzoq nasihat qildi: boy otadan uzr so'ra, tovba qil, bolalik qilibman, degin Otam boyga bosh urib kelgach, u bitta toying bor, o'shani bersang, yo'pti-yo'pti qilamiz, ertaga o'g'lingni qo'yvoramiz, depti. O'sha toy sen eding, lochinim! Tushingni suvga aytasan, boy, dedim. Yarim kechada payt poylab turib, yerto'la eshigini buzdim. Otxonadan seni topib chiqib, uyga jo'nadim. Meni ko'rib otamni qaltiroq tutdi. "Boy tong otgach, qo'yvormoqchi edi-ku! Yo qochib keldingmi?" Indamay turaverdim. "Hoziroq toyni oborib ber. Ertaga o'zim borib obkelmaganimcha, ostonadan o'tma!" Otam cho'rtkesar edi. Gapini ikki qilib bo'lmasdi. Seni yetaklab hovlimizdan chiqarkanman, o'ylanib qoldim. Nega endi faqat boyning aytgani bo'ladi? Men o'g'irlik qildimmikin, otamning tili qisiq, toyimni boyga berib qo'yadi? Nazarimda boy ustingga o'tirayotganday, semiz gavdasini ko'tarolmay beling mayishib ketayotgandayin bo'ldi. Xayol surib-surib, bir mahal qarasam, Lochinxonada, eski qo'rg'on oldida turibman. "Endi sen Lochin bo'lasan, men ham lochin bo'laman, shu yerda yashayveramiz!" Sen gapimni tasdiqlagandayin kishnading. Ikki-uch kun u yoq-bu yoqda tentirab yurdik. Kunduzi bir iloj qilib o'tardi, kechalari ko'z yumishim bilan hovlimiz, onajonim ko'rnaverardi. Bir kecha uyqum kelmay, yotolmadim. Qishloqqa jo'nadim. Onam avvaliga rosa suyunib, keyin xavotirga tushdilar.

"Nega bu ishni qilding-a, bolam? Zarur bo'lsa, alam o'tsa, haqlarini o'zlari topvolishsin edi, senga nimaydi-ya, bolam?"

"Onajon, o'zingiz yaxshilik yerda qolmaydi, deysiz-ku".

"To'g'riku-ya Ular yaxshilikni bilmaydigan chiqishdi. Boy hammasini bir qop-bir qop donga sotvolibdi. Faqat bittasi olmabdi, xolos, imoni borakan."

"Bittasida imoni borakanmi, ishqilib. Demak"

"Bolam ko'nglim allanechuk xavotir, boyning odamlari necha marta izg'ib kelishdi. Tag'in"

"Men ketaymi, bo'lmasa?"

"Mayli, boraqol, boshing toshdan bo'lsin!"

Devordan o'tishimni bilaman, qo'llarimni qayirishdi. O'sha zax yerto'lada yana bir kecha tunadim. Ertasiga guzar oldidan olib o'tishdi. Ko'cha to'la tumonat odam. Hamqishloqlarim meni sog'inib qolishipti-da, dedim. Bir mahal qaysi go'rdan boy paydo bo'ldi. "Xaloyiq, bu kim?" So'zi og'zidan chiqar-chiqmas o'n-o'n beshtasi "o'g'ri" deb baqirdi. Ovozlarini boy otalari eshitmay qolmasin, deb cho'chisharmidi, tomoq yiritgudek baqirishar-di. Hech kim bilan ishim yo'g'idi, o'sha beshovlonni qidirardim.

Nihoyat, to'rttasini top-dim. Boy ular tomon qarashi bilanoq "o'g'ri, o'g'ri" debon chiyillashardi. Lekin bittasi ko'rinmasdi. Izlab-izlab uniyam topdim. U odamlar ortida boshini eggancha turardi. "Boshingizni ko'taring, imoni bor odam, anovilar bosh egdin!" Haligi bir qop donga sotilganlarning basharasini ko'rolmay qolganim rosa alam qildi. Aravaga qo'shilgan otga qamchi bosishdi. Achchiq qamchi zarbidan bir irg'ishlab chopib ketgan otga qo'shilgan arava qattiq chayqaldi. Sal bo'lsa, qulayozgandim. O'sha kuni otamni ko'rmadim Zerikdingmi, lochinim? Nima qilay, yuragim tars yorilay deyapti. O'shanda baribir shaharga yetmasdan qochib ketdim-ku. O't-betlarda uloqib yura-yura, qosh qorayganda Lochinxonaga keldim. Sen eski qo'rg'on atrofida yurgan ekansan O'shanda o'n yettidamidim? Allaqachon o'n yildan oshibdi-da Lochin, esingdami, o'sha gaplardan keyin bir yil o'tgach, qishloqqa borganimiz? Anovi to'rttaning uyiga qoplarda mayda-chuyda olib boruvdik-ku! Tilanchi bo'lib qishloqqa borgan

yigitimiz nima gap topib keluvdi? Osmondan tushgan boylik hammasiniyam es-hushini og'dirayozibdi. To'rttoviyam garangga o'xsharmish. Har gapining boshida "Ollohga shukr" deyisharmishu, lekin tilanchiga bir burda non ham berishmapti. Eshigiga borgan tilanchiga Eh, sen odamzot fe'lini bilmaysan-da. Men keyinchalik u yoq-bu yoqdan surishtirganman. To'rttoviyam "osmondan tushgan boylik" haqida hech kimga og'iz ochmagan Lochin, endi bor, sen bir yayrab kel, men biroz dam olayin, tongga yaqin daryo kechamiz".

Arslon qo'rg'on devoriga sakrab chiqdi. Oldinlari yurtga oralaydigan yovning yo'li avvalo shu qo'rg'onida to'silardi. Bora-bora tashlandiqqa aylangan qo'rg'on xonalarining butun qolgan tomlaridan birida Arslon picha mizg'imoqchi bo'ldi. Lekin qattiq toliq-qaniga qaramay hech uyqusi kelmasdi. Ko'zi ilindi, deguncha, qishloq odamlari so'yil, ket-mon, bel ko'tarib boshiga kelishar, "o'g'ri, boringdan yo'g'ing yaxshi, hammamizni isnodga qoldirding", deya baqirib-chaqirishardi. Tevarak-atrofga Lochin o'g'ri deya nomi ketgan yigitning ko'kragini achishtirib bir nima g'imirladi. Uyqusi butkul o'chdi. Yuragini bo'shatay desa, biron suhbatdosh yo'q. Hozir qutiulug'lik yigitcha yonida bo'lganda edi Dunyo qiziq-da, shuncha odamni ko'r-di-yu, biron tasi uni shu yigitchalik tushunmagan. Hozir qutiulug'lik yigitcha yonida bo'lganda edi Dunyo qiziq-da, shuncha odamni ko'r-di-yu, Biron tasi uni shu yigitchalik tushunmagan. Naq o'yidagini topadi-ya Aytish kerak, u to'dadan ketsin, boshqa kasb etagini tutsin.

Shu topda shart otiga minsa-yu, boshi oqqan tomonga ketsa. Biron odam kimsan, qaerdan kelyapsan, qaerga ketyapsan, deb so'ramasa. Ketaversa, ketaversa

Birdan pastda sharpa eshitildi. Kimlardir ehtiyotkorlik bilan qadam bosishardi. "Ko'zingga qarasang-chi, eshak!" Xunuk to'ng'illagan ovoz tun sukunatini to'lg'atdi. Qaerda-dir eshitgandi bu ovozni. Tanish

- Yosh ketib, yurak shirillaydigan bo'p qopti-da, og'a. Bu boyo'g'lixonaga yarim tunda kela-digan odamning yuragi otdek bo'lishi kerak.

- E, hali sen ertalab tuxum yorgan jo'jasan. Menga o'xshab shatta yeyversang, ukkilar makonidayam bir cho'qib, o'n qaraydigan bo'p qolasan. Bor, sarkardani boshlab kelaver.

Tanidi, endi tanidi, qoraquroqlik kal o'g'ri-ku. Chulchutning to'dasidan. Sarkarda emish. Hadeganda gapga tushunavermaganidan chulchul laqabini olgan o'g'riboshiyam qora-quroqlik edi. Uzog'i yili u Arslonning to'dasiga qo'shilgandi. Bir kosibning uyini tunagach, Arslon urib-so'kib haydavorgandi.

Qoraquroqlik o'g'rilarning rejasini eshitib, Arslonning a'zoi badanini ari chaqqan-day bo'ldi. "O'n yildan beri Ispisorga o'g'ri oralamasa-ya. Qachongacha o'sha o'g'ri mushukcha-dan qo'rqib yuramiz? Qani, bo'linglar, yoz kechasi bir tutam, bitta-ikkitasi uyg'onmasdan burun ishshi bitiraylik!"

Tom zirillab ketgandayin bo'ldi. Mayli, uni mushuk deydimi, boshqami, u baribir arslonligicha qolaveradi. Lekin daryoning nariyog'idan, qoraquroqdan kelib, uning qish-log'ida o'g'irlik qilishlarini o'ylab, suyak-suyagicha zirqiradi. Tomdan sakrab tushib uchoviniyam dabdalasini chiqarishga chog'landi. Yo'q, pastga tushishiyam shart emas, tomdan turib bir baqirsa bo'ldi, ovozidan tanib, orqalariga qaramay qochishadi. Lekin ursayam, qochishsayam, bir tun kelib, Ispisorga o'g'irlikka tushishni o'ylashmaydimi... Arslon oshib-toshib kelayotgan g'azabini ichiga yutdi. Qoraquroqliklarning qo'rg'onidan chiqib ketishlarini tishini tishiga qo'yib poyladi. Qo'rg'on bo'shagach, oradan xiyol vaqt o'tkazib, Lochinni chaqirdi. Qorama-qora yo'lga tushdi.

Erta tongda butun qishloq vahimadan tong qotdi. Boyning, yana bir o'ziga to'qroq kishining eshigi buzilgan, anchagina narsa ko'chaga tashib chiqarilgandi. Qishloqqa o'g'ri tushibdi xabarini eshitgan har bir odam o'z uyidan xavotirlandi. Boshqa uylar tinch edi. Ikki soat orasidayoq hammayoqni vahima xabarlar bosib ketdi. "O'g'rilar molga kelishol-may janjallashishipti., bittasining o'ligini topishibdi." "B Arslon o'g'riniyam tutishib-di, uniyam pichoqlashgan ekan"

Arslonni hovlilari yaqinidagi terakzordan topishdi. U tunda qoraquroqliklar-ning ortidan qorama-qora kelgach, avvaliga ularning uy tunashlarini kuzatib turdi, keyin Chulchutni ushlab olib, o'g'irlagan narsalarining hammasini joy-joyiga kiritib qo'yishni buyurdi. Qoraquroqliklar narsalarni tashisharkan, Arslonning istehzo aralash gerdayib jonlari halqumga keldi. Bittasi ko'zshamg'alat qilganacha orqaga o'tib, Arslonga pichoq sanchdi. Qo'rqanidan qo'li qaltirab pichoqni mo'ljalidan yurakdan ancha yiroqqa urdi. Arslon og'ir og'riqqa dosh berib, pichoqni orqasidan sug'urib olib, qochib borayotgan qoraquroqlikka otdi. U dodlab yubordi. Odamlar uyg'onishlaridan qo'rqan Chulchut bilan Kal qochib qolishdi

Arslonning kuragidan pastrog'i qattiq og'rirdi. Terakzor tomon gindiraklab borayot-gan Arslon ko'yiligini yirtib, yarasini bog'ladi. Pichoq o'rni jonini achishtirib og'rir, lekin miyasida yolg'iz bir o'y uyiga yetvolish, onasini ko'rish! Ana, beshik uyurmaga yaqinlashyapti, onaginasini qo'lini uzatyapti. Nimadir kelib qo'lini yalaydi, qarasa, oti. Lochin zorlanganday bo'ladi. Lekin egasi buni sezmaydi, ko'z o'ngida qo'l uzatib turgan onasi

Uni terakzordan topishganda behush edi. O'sha ondayoq butun viloyatga xabar ketdi: "Lochin o'g'ri qo'lga tushibdi. Osimboyning mulkiga ko'z olaytirgan ekan, Olloh taoloning tig'i parroniga uchrabdi. Viloyatning diyonatli boylaridan bo'lmish ko'p shafqat ko'rsatib, uni buyog'i qo'qonlik, uyog'i toshkentlik eng zo'r tabiblargacha davolatmoqda"

Qoraquroqlik o'g'rining o'ligini hech kim so'rab kelmadi. Arslon uni tanimayman dedi. U Chulchutni, Kalni tanirdi-yu, lekin bu yosh yigitni tanimasdi. Tanigandayam, uning kim-ligini aytmasdi. U yigitning yigirma yoshlar atrofida eshtar ekan, yuragi jizilladi Arslon picha sog'aygach, uni boyning yerto'lasiga qamashdi. "Uchinchisi uchinchisi" Ortiq qutulish haqida o'ylamay qo'ydi. Nuqul ko'ziga uyurma ko'rinar, cho'kib borayot-gan beshikka onasining qo'llari cho'zilganacha qolgan, qoraquroqlik o'g'ri yigitning qo'li uyur-ma ichidan Arslonning bilagini mahkam ushlaganacha tartardi. "Jazo haq haq. Nega endi pichoq sanchishganda o'lmadim? Xudobexabar boylar shuncha pistirma qo'yishdi, qotillar yollashdi, biron tasi o'qiga uchsam bo'lmasmidi" U jazodan qo'rqmasdi, aslo. Agar, bordi-yu, sazoyi qiladigan bo'lishsa, otasining, ukalarining ne ahvolga tushishlaridan tashvishlanardi. Yerto'lada uch kecha-yu uch kunduz yotgan bo'lsa, bugun tong sari ko'zi ilinibdi. Tuynuk oldi-ga Lochini kelib uyg'otibdi. Otning ma'yus ko'zlari bir nimalarga imlarmish. Tuynukdan chiqishi zahoti otini qayoqqadir sudrab ketishibdi. Ot chopib kelib, yerto'la eshigini buzibdi

- Tur, namuncha uyqung qattiq, - Arslon Lochinini haydavorgan odamlarning yoqasidan olmoqqa tutindi. Biroq ikki qadam tashlamasdan, oyog'idagi zanjir tarang tortildi.

- Bukrini go'r to'g'rilaydi, deyishadi-ya. Yana bunga boy ota shafqat ko'rsatib o'tirib-dilar. Hoy, ko'zingni och, boy ota biron-bir tilagi bo'lsa, aytsin, deyaptilar.

Arslon xuddi arvohlarni ko'rayotgandek baqrayib turaverdi. Qarshisida turganlar "e, bor-e" deya g'azab bilan qayrilishganda, o'ziga keldi.

- Tilak?! Boy aytgan so'zida turadimi? Bo'пти, ishondim. Agar sazoyi qilishsa, otamni, ukalarimni tashqari chiqqani qo'yishmasin Yerto'la devori qahqahadan cho'chib tuproq to'kdi. Ikki kishi bir-biriga qarab qorin ush-laganacha qotib-qotib kulishardi.

